

LA FLOUR AMOUROUSO

Vers lou sòu tristamen clinado,
Te passisses, pichoto flour...
Perqué ta courouno esanado
Se barro i caresso dóu jour?

Perqué, quand tóuti ti sourreto
Urouso bevon lou soulèu,
Tu soulo, galanto floureto,
Noun lèves toun front vers lou cèu?

Un jour, emé sa voues calino
Un parpaiounet fouligaud
Me diguè : «T'ame, mistoulino ! »
L'escoutère ; me fasié gau !...

De sis alo me pounpounavo...
Ah! Coume èron dous li poutoun
Qu'amourousamen me dounavo,
Quand iéu n'ère qu'un fres boutoun !..

Mai subran pèr la Margarido
Me laisso, lou bèl enseda !
Pièi vai beisa d'uno escourrido
La Vióuleto e lou Reseda...

Voulè de floureto en floureto:
Ile, Roso, Miousoutis,
Poutounè tout, e iéu, paureto !
Despièi l'espère e l'ai plus vist !...

Vaqui perqué siéu malurouso !
D'un parpaioun, chatouno o flour,
Te rèndes jamai amourouso,
Se tu noun vos tounba de plour.

Antounieto de Bèu-Caire